

Repartì auter ils 60 mandats da delegads

Corpus Catholicum

■ **(anr/gc) La radunanza dal Corpus Catholicum – l'istanza politica suprema da la baselgia catolica grischuna – ha revedì mesemna a Cuira il reglament da 1984 pertutgant la tscherna dals 60 delegads da las plaivs. Quai è vegnì sancziunà cun 81:0 vuschs e senza discussiun.** Il Corpus Catholicum, il parlament da la baselgia catolica chantunala, sa cumpona dals suandants delegads: Dus derivan da l'Ordinariat episcopal. Vitiers vegnan er ils cussegliers guvernativs e deputads catolics en il cussegli grond. Las plaivs delegheschan 60.

Adattà il reglament da repartiziun

En il reglament da 1984 ha il Corpus Catholicum gì fixà ils circuls electorals

per ils delegads, la repartiziun dals mandats e la procedura d'eleger. En tut deva i 28 circuls electorals per eleger ils 60 delegads da las plaivs.

Scadin circol electoral cumpiglia ina u pliras plaivs. Dentant han insaquantadad ellas fusiunà, oravant tut dapi ch'il nov urden da contribuziun è i en vigur 2015. Quai ha reduci il dumber da plaivs ed er effectuà novas. La consequenza è che la repartiziun da fin uss en ils circuls n'è betg pli correcta.

Perquai è ina adattaziun a las novas circumstanzas stada necessaria. Las plaivs che n'existan betg pli, per il pli pitschnas, ston vegnir remplazzadas tras pli grondas. Uschia han ins era stuì metter ensemen circuls electorals. Quai pertutga Al-

vaschein /Belfort/Bravuogn che furman suenter la fusiun ina plaiv d'Alvra. Il dumber dals circuls electorals vegn qua tras reduci da 28 sin 27. Segund l'urden da 1984 deva i 131 plaivs. Quest dumber è sa reduci tras fusiuns e po anc ir vinavant enavos.

Decisiv è il dumber dals catolics

Per constatar il dumber da la populaziun catolica en il Grischun vala la davosa dumbraziun dal pievel. Cunquai ch'i na dat betg pli talas eruescha il Corpus Catholicum (cumissiun administrativa) dapi ch'il nov reglament da contribuziuns è en vigur 2015 il dumber dals catolics en mintga plaiv tar las vischnancas politicas. Questa cifra è la basa per reparter ils

mandats da delegads sin ils singuls circuls electorals.

La baselgia catolica dal Grischun ha repartì ils 60 mandats da delegads tenor las novas circumstanzas. En il territori rumantsch datti en l'avegnir, mintgamai a basa dal dumber da catolics, il suandant dumber da delegads: Alvaschein/Belfort/Bravuogn dus; Cadi quatter; Glion trais; Lumnezia dus; Engiadin'Auta tschintg; Ramosch/Suot Tasna dus; Razén/Stussavgia quatter; Rueun in; Schons/Avras/Valragn in; Sursés dus; Sur Tasna in; Trin in; Val Müstair in.

En tut represchantan ils 60 delegads da 27 circuls electorals 90 133 catolics (u 54 pertschient da la populaziun grischuna).